

दिनांक 21.08.2025

समय: 18.45 बजे

- संसद ऑनलाइन गेमिंग संवर्धन अर विनियमन बिल 2025 पास कीनो।
- लोकसभा अर राज्यसभा री कार्यवाही बेमियादी बगत सारू टळ्यां पाछे संसद रो पावस सत्र पूरो व्हयो।
- कोटा—बूंदी ग्रीनफील्ड हवाई अड्डो बणावण रो काम आवता महीना सरू व्हेला।
- प्रदेश मांय चौमासा री बिरखा ओजू तेज़ व्ही—घणाखर हलकां मांय बरसात रो दौर जारी।

000

संसद ऑनलाइन गेमिंग संवर्धन और विनियमन विधेयक, 2025 पास कर दीनो है। राज्यसभा इण ने आज मंजूरी दीनी। ओ बिल ई—स्पोटर्स अर ऑनलाइन सोशल गेम्स ने बधावो देवेला अर नुकसानदायक ऑनलाइन मनी गेमिंग सेवावां, विज्ञापनां अर वां ऊं जुड्या माली लेन—देन माथे रोक लगावेला। बिल मांय ऑनलाइन गेमिंग प्राधिकरण बणावण रो ई प्रावधान करी ज्यो है। ऑनलाइन मनी गेमिंग ऊं जुड्या कानून नी मानण री सूरत मांय तीन साल तांई री कैद अर एक करोड़ रुप्या तांई रो जुर्मानो या दोन्यू सजा रो प्रावधान करी ज्यो है। इलेक्ट्रॉनिक्स अर सूचना प्रौद्योगिकी मंत्री अश्वनी वैष्णव बिल पेश करता थकां कहयो के ऑनलाइन मनी गेमिंग समाज सारू खतरो बण ग्यो है अर हर साल 45 करोड़ लोग ऑनलाइन खेलां मांय करीब 20 हजार करोड़ रुप्या गमा देवे है।

.....

ऑनलाइन गेमिंग संवर्धन अर विनियमन बिल रो प्रदेश मांय ई स्वागत कर्यो जा रहयो है। सवाईमाधोपुर री एक गृहिणी आशा शर्मा कहयो के सरकार रा ई फैसला ऊं समाज मांय गेमिंग री लत अर माली दगाबाजी री घटनावां माथे काबू कर्यो जा सकेला।

000

लोकसभा अर राज्यसभा री कार्यवाही बेमियादी बगत सारू टाळ दीरीजी है। ई सागे ई संसद रो पावस सत्र पूरो व्हे ग्यो है। ई मौके लोकसभा अध्यक्ष ओम बिरला कहयो के सत्र रे दौरान 14 बिल पेश करी ज्या, ज्यां मांय ऊं 12 पास व्हे ग्या। वे कहयो के विपख रा सदस्यां कानी ऊं पैदा करी ज्यी अड़चन रे कारण सदन मांय बमुश्किल 37 घंटा काम कर्यो जा सकयो। राज्यसभा रा उपसभापति बतायो के सदन महज सवा 41 घंटा चाल्यो, जिण री उत्पादकता 38 दशमलव आठ फीसदी रही। स्थगन ऊं पैली राज्यसभा आज तीन बिल संसद री संयुक्त समिति ने भेज दीना। आं मांय 130वों संविधान संशोधन बिल, केंद्र शासित प्रदेशों की सरकार संशोधन बिल अर जम्मू—कश्मीर पुनर्गठन संशोधन बिल शामिल है।

000

प्रदेश मांय भणाई—लिखा रा विकास सारू केन्द्र सरकार री ओर ऊं 3 हजार 200 करोड़ रुप्या मंजूर करी ज्या है। ई रकम ऊं कस्तूरबा गांधी आवासीय विद्यालय अर नेताजी सुभाष चन्द्र बोस आवासीय विद्यालय मांय न्यारा—न्यारा काम कराया जावेला। ई रे अलावा स्कूलां मांय बणाई—चुणाई अर मरम्मत रा काम कराया जावेला। ई सागे ई स्कूलां मांय व्यावसायिक शिक्षा, डिजिटल लैब अर नवाचारां ने बधावो दियो जावेला। ध्यानजोग है के मुख्यमंत्री भजनलाल शर्मा हाल ही मांय नई दिल्ली मांय केन्द्रीय शिक्षा मंत्री धर्मेन्द्र प्रधान सागे मुलाकात कर र आ रकम जारी करण री अरज कीनी ही।

0000

प्रदेश रा नौजवानां ने दूजा देशां मांय नौकरी लायक बणावण रा मकसद ऊं अंग्रेजी, फ्रेंच, स्पैनिश अर जापानी सरीखी भाषावां सिखावण री 'लैंग्वेज लैब' बणायी जावेला। मानव संसाधन विकास मन्त्रालय अर इंग्लिश एण्ड फॉरेन लैंग्वेज यूनिवर्सिटी री ओर ऊं आ लैब चलायी जावेला। लैंग्वेज लैब रे मार्फत विदेशी भाषावां री सिखावण ऊं नौजवानां ने सैर-सपाटा, कारोबार, आईटी, भणाई-लिखाई अर सेवा हलका मांय नौकरी-धंधा रा मौका दिरावण मांय मदद मुहैया करायी जावेला।

000

कोटा-बूंदी ग्रीनफील्ड हवाई अड्डो बणावण रो काम आवता महीना सरू कर दियो जावेला। लोकसभा अध्यक्ष ओम बिरला ईं बारा मांय आज नई दिल्ली मांय केंद्रीय नागरिक उड्हयन मंत्री राममोहन नायदू अर दूजा आला अहलकारां सागे मीटिंग कीनी। मीटिंग मांय श्री नायदू लोकसभा अध्यक्ष ने एयरपोर्ट परियोजना ऊं जुऱ्या काम री जाणकारी दीनी। वे बतायो के ओ काम करीब दो साल मांय पूरो करणो तैय करी ज्यो है। साल 2027 मांय ईं हवाई अड्डा ऊं उडानां सरू व्हे जावण रा आसार है। श्री बिरला कहयो के ओ हवाई अड्डो हाडौती अंचल रा सामाजिक-आर्थिक विकास ने बधावो देवेला अर नौकरी-धंधा रा नुवा मौका मुहैया करावेला। हवाई अड्डा री डिजाइन मांय राजस्थान री पारंपरिक वास्तुकला अर सांस्कृतिक धरोहर रो खास ध्यान राख्यो जावेला। मीटिंग मांय कोटा रा मौजूदा हवाई अड्डा रा परिसर मांय एयरपोर्ट ऑथॉरिटी ऑफ इंडिया री ओर ऊं सिखावण देवण रो खास इंस्टीट्यूट सरू करण रो फैसलो करी ज्यो।

000

राज्य मांय शहरी अर औद्योगिक गैस वितरण तंत्र-सीजीडी ने बधावण सारू बेगी ई केन्द्रीकृत वेब पोर्टल सुविधा सरू करी जावेला। खान अर पेट्रोलियम विभाग रा प्रमुख शासन सचिव टी. रविकान्त बतायो के ई पोर्टल माथे राज्य मांय चाल रही 13 सीजीडी संस्थावां ज़रुरी मंजूरियां हासिल करण सारू ऑनलाईन तरीका ऊं अर्जी दे सकेला। ई सागे ई संबंधित संस्थावां ई ऑनलाईन तरीका ऊं मंजूरियां दे सकेला। ऑनलाईन व्यवस्था ऊं मुख्य सचिव अर प्रमुख शासन सचिव लेवर माथे निगराणी राख्यी जा सकेला। ध्यान जोग है के राजस्थान सिटी गैस डिस्ट्रीब्यूशन नीति, 2025 जारी करीजी ही।

000

प्रदेश मांय चौमासा री बिरखा ओजू ज़ोर पकड़ लीनो है। लम्बा आंतरा पाछे आज प्रदेश मांय केई ठोडां मेह बरस्यो। राजधानी जयपुर मांय रुक-रुक र बरसात व्ही। जोधपुर संभाग रा कुछ हलकां मांय दोपहरां री बगत झमाझम बिरखा व्ही। सिरोही ज़िला मांय पिंडवाडा अर स्वरूपगंज समेत केई हलकां मांय मेह बरस्यो। सवाईमाधोपुर मांय व्ही चोखी बरसात पाछे मौसम सुहावणो व्हे ग्यो। तेज बरसात ऊं रणथंभौर रा किला अर त्रिनैत्र गणेश मिन्दर रा गेला माथे पाणी भर जावण ऊं गेलो बंद व्हे ग्यो। पाली मांय व्ही तेज बारिश ऊं केई ठोडां पाणी भर ग्यो। म्हाणा खबरनवीस बतायो के ज़िला मुख्यालय अर गांवाई हलकां मांय व्ही बिरखा पाछे लोगां ने परेशानी रो सामो करणो पड़यो।

.....

बारां मांय ज़िला मुख्यालय अर शाहबाद हलका मांय मूसलाधार बरसात व्ही। म्हाणा खबरनवीस बतायो के इण ऊं नेशनल हाईवे नम्बर 27 माथे आवण-जावण माथे असर पड़यो।

.....

मौसम विभाग आज 28 ज़िलां मांय तेज बारिश व्हेवण सारू चेतायो है। नागौर, बाडमेर, जैसलमेर, जयपुर, टॉक, अलवर अर सीकर ज़िला मांय तेज बरसात रो ऑरेंज अलर्ट जारी करी ज्यो है।

000

खाद्य अर नागरिक आपूर्ति मंत्री सुमित गोदारा आज चित्तौड़गढ़ मांय राष्ट्रीय खाद्य सुरक्षा योजना अर गिव-अप अभियान रा तैत कराया जा रह्या कामां रो जायजो लीनो। मीटिंग मांय गोदारा जरूरतमंद पिरवारां ने सस्तो अन्न मुहैया करावण सारू गिव-अप अभियान ने खास जतन बतायो। वे चित्तौड़गढ़ ज़िला मांय हाल ताँई 54 हजार ऊं बत्ता पात्र लोगां कानी ऊं मर्जी ऊं राष्ट्रीय खाद्य सुरक्षा योजना ऊं नाम हटावण री सराहवणा कीनी। श्री गोदारा अहलकारां ने नुवा लाभार्थियां ने टेमसर राशन कार्ड जारी करण रा हुकम दीना।

000

प्रदेश मांय खाद री रोजीना री उपलब्धता माथे कृषि विभाग री ओर ऊं लगातार निगराणी राख्यी जा रही है। महकमो कम उपलब्धता अर बत्ती मांग वाढ़ा ज़िलां अर ब्लॉक्स री पिछाण कर र वठे डी.ए.पी. अर यूरिया खाद मुहैया करावण माथे खास ध्यान दे रह्यो है। विभाग रा शासन सचिव राजन विशाल बतायो के खरीफ 2025 सीजन मांय अप्रैल ऊं हाल ताँई 8 लाख 5 हजार मीट्रिक टन यूरिया री पूर्ति करी जा चुकी है, जद के 3 लाख मीट्रिक टन ऊं बत्ती डीएपी खाद किसानां ने मुहैया करायी ज्यी है। वे बतायो के केन्द्र सरकार री ओर ऊं राज्य ने आ खाद आवंटित करी ज्यी ही।

000

भारतीय राष्ट्रीय राजमार्ग प्राधिकरण साफ कीनो है के देश भर रा नेशनल हाई-वे अर नेशनल एक्सप्रेस-वे माथे टोल प्लाजा परां स्कूटर-मोटरसाइकिलां वाढ़ां ऊं कोई टोल फी नी ली जावे है। सड़क परिवहन अर राजमार्ग मंत्रालय कानी ऊं जारी एक बयान रे मुजब नेशनल हाईवेज माथे दोपहिया वाहनां ऊं टोल लेवण रो कोई प्रस्ताव नी है अर ई बारा मांय सोशल मीडिया माथे चाल रही खबरां फर्जी है।

000